


Falsafah dan Kebudayaan

Kedudukan Masjid dalam Masyarakat Islam

Pada umumnya masjid ialah untuk ibadat, untuk merapatkan diri dengan Tuhan. Akan tetapi selain daripada itu masjid juga menjadi pusat bagi mengatur dan memimpin masyarakat Islam.

Junjungan kita Muḥammad *ṣallā Allāhu ‘alayhi wa ‘ālihi wa sallam*, setelah berhijrah dari Mekah ke Madinah, ketika



Masjid al-Sultān Ḥasan ibn al-Nāṣir ibn Muḥammad Qalāwūn, di Mesir. Didirikan pada tahun 746 Hijriyyah (1363 M.). Salah sebuah masjid yang amat indah, berhias dengan ukiran-ukiran dan ayat-ayat Quran yang menarik dan menakjubkan.


melangkahkannya yang pertama untuk mendirikan umat Islam maka masjidlah yang pertama yang dibinanya lebih dahulu, tempat kaum Muhajirin dan Ansar menghubungkan diri dan beribadat kepada Allah *‘azza wa jalla*, tempat perhubungan antara sesama mereka, menyusun langkah yang akan dilakukan.

Markas perjuangan umat Islam

Masjid ialah tempat menyirami kalbu dengan iman, tempat orang memberi ubat penyakit, dan juga menjadi markaz (tempat pertadbiran) perjuangan umat Islam dengan pengertian yang luas.

Sungguh tepat pengertian yang diberikan oleh penganjur Islam yang kebilangannya *al-Ustādh* Muhammad Natsir:

Masjid ialah tempat orang Islam memancarkan Islamnya, untuk menjadi pedoman hidup bagi seluruh alam. Tempat mengatur serta memperbincangkan keadaan-keadaan yang mesti dihadapi. Masjid juga tempat memancarkan bahagia, nur untuk menjadi pedoman hidup kita. Dari masjidlah timbulnya semangat yang menggelorakan jiwa, untuk melakukan kerja-kerja yang besar, yang berkehendakkan jiwa yang besar, yang diperhidup dan dinyalakan di dalam masjid itu.



Suatu pemandangan yang indah dalam Masjid Sulaymān Bā Bāshā, masjid ini didirikan oleh Pesuruhjaya Turki di Mesir pada tahun 935 Hijriyyah (1528 M.). Bumbungnya terdiri daripada beberapa buah kubah. Berhias dengan ukiran-ukiran indah, dan tulisan ayat-ayat Quran dengan khat cantik dari berbagai-bagai bentuk dan jenisnya.

Masjid itu pula pada saat yang bergolak, dapat dijadikan tempat berkumpul memperbincangkan nasib umat Islam, dan kerana itu kita tertuntut menghargakan dan memelihara kedudukan masjid yang demikian sifatnya. Masjid tempat kita berbuat ibadat, tempat kita mengatur siasah perjuangan.

Mencapai kejayaan – dunia akhirat

Dari masjid yang tegak berdiri dengan kukuhnya di bumi, dengan menaranya yang menjulang ke langit, bergemalah suara azan menyeru umat Islam beribadat kepada Ilahi

Rabbi dan juga menyediakan diri untuk mencapai kejayaan (*al-falāh*).

Tugas umat Islam di dunia

Kita umat Islam seyogialah sedar akan kedudukan kita yang menjadi “*ummatan wasatān*” (umat yang pertengahan), yang seimbang hidupnya antara zahir dan batin, antara ruh dan jasad, menjadi pelopor dan pengawas serta pemimpin dan pembimbing umat manusia. Bukan kecil tugas itu!